



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :



Tir Yimyim



tirymyim@aolima



tir yimyim

TAPAK 7

Assam nung double-engine
sorkar menügdaker: Priyanka

PM-i 'Catch The Rain'
campaign tenzüksüogo



VOL. XVIII NO. 158 (ADOK 158) DIMAPUR

SANGTENNÜ (TUESDAY)

METSÜREMI (MARCH) 23, 2021

₹ 5.00

Mokokchung nung World Water Day mungogo

Mokokchung, Metsüremi/ March 22 (TYO): Hombarnü PHED Mokokchung Division Executive Engineer office nung World Water Day mungogo. Iba sentong nung ADC Mokokchung Shashank Pratap Singh tetushi tesemdanger liasü.

Sentong nung o jembiba mapang Singh-i, tzü ajanga alima nung taküm lir aser asenoki tzü peria lir ta ser yimbazüa magitsüla, kechiyong iba ajanga tzü jenjang ajema kümdaktsütsü ta ashi. Iba dak sendakba nung pai sentepa aliba lokti dang, tzü tajemba amshitsü aser tanaben amshishitsü atema jenjang tapet agitsü nügdaker ta ashiba den iba inyakyim ya kidang nungi tenzüksüla ta ashi.

Pai, state kübok tenem nung aliba district tem tzünglu maruba mapang tzü agi anüంగా indang ateshia iba olen lemsatp.

ADC-isa, tzünglurowa nung tzünglutzü bendena ayuba ajanga tenem nung aliba district tem tzü agi anüంగా nungi jenbotsü atema kanga

tongtibang asütsü, ta ashi.

Kasa mapang nung Executive Engineer PHED Mokokchung Division Yanger Pongen-i, Jal Jeevan Mission (JJM) dak ajemdaker jembi, koba NDA sentong ka lir aser iba sentong kübok nüburtem nem tzü tajung agütsütsü meranger.

Executive Engineer-isa, JJM ya district nung tangang tetenzükda lir ta shia iba sentong takok asoshi nüburtem nem tangazükba agütsütsü ayongzük, kechiyong JJM ya mapang atakzük inyaker aser 2025 küm tashi nungbo tembangtsüla.

Maneni pai, district nung tzüpokdak timbaka kong a odar ta ashi. Iba dak sendakba nung pai WATSAN aser Village Council tem dang tzü atsüngdenba tesemtem nung süngtong matsüngtsü atema tangazükba agütsütsü ayongzük.

Sentong nungsa Aolijen nungi swachhagrahi Arkumla-i, "Valuing Water" onük nung ajemdaker jembi.

Peren district nung nisung asem khaset

Dimapur, Metsüremi/March 22 (TYO): Hombarnü nikongdang 5:00 ako meta nisung tamajungertemi Nagaland nung aliba Peren district kübok Lamhainamdi yimtsüing nung nisung asem khaset, ta osang ka ajanga ashi.

Osang ajanga ashiba agi, isung asem ya Peren district kübok Lamhainamdi yimtsüing nung alu inyakba mapang iba lendong ya atalok. Par asem tasümgang den parnok indang

garia mi agi ronger lia angu, ta ashir.

Osang ajangasa ashiba agi, asür ya nisung ana Peren town nung alir saka Benreu yimtsüing aser Mpai yimtsüing nungi lir, aser tasembuba ya ano mejangjateti lia iba osang zülü.

Jalukie Police ajanga iba tatalokba indang osang kecha sangdonga mali, kechiaser tang bushisüingdangba mapang lir aser osang metetdaksütsü kerara, ta OC ajanga ashi.

March 2 nüa NSCN (U) puri Lamhainamdi yimtsüing nungi civilian asem tashi pua yua liasü. Iba sülen ozüing alema civilian tem pua ayuba asoshi Zeliangrong Students' Union (ZSUN) ajanga Jalukie nung longkak aitba sentong ka agi aser iba ken o nung Nagaland Angh, RN Ravi-i teka amuoktsü takhangba agüja memorandum ka agütsü. Civilian tem ya March 15, 2021 nü chioka liasü.

COVID-19 Nagaland: Anogo tekububa nisung kadakdanga tashidak mepotet

Kohima, Metsüremi/ March 22 (TYO): Nagaland nung anogo tekububa atonga nisung ka dak danga COVID-19 tashidak mepotetba sülen tashidak menar 12,225 nung dang lir, ta health ketdangstür kati ashi.

"Tanü nisung ka dak danga tashidak mepotet aser nisung ka danga anepba osang mali," ta Health Minister S Pangnyu Phom-i tweet asü.

Tang tashi nung tashidak menar alir nisung 11,978 anepa recovery rate 97.98 percent nung lir, ta Director of Health and Family Welfare, Dr Denis Hangsing-i ashi.

Tang tashidak anepalua alir nisung ana dang lir koba tashidak menaba jangjar alir shilem 0.02 asütsü.

Nagaland nung tang tashi nung iba tashidak agi nisung 91

süogo aser nisung 154 tanga state-i ogo, ta paisa ashi.

Tang temang anepalua alir nisung ana ya ka Kohima nung aser Mokokchung nung lir.

Nagaland nung tang tashi nung COVID-19 samples 1,34,968 tendangogo, kong RT-PCR nung sample 75,321, TrueNat ajanga sample 37,500 aser Rapid Antigen Test ajanga sample 22,147 tendangba densema lir.

Minister Kronu-i tetsür shishilembar atema EA bus service tenzüksü

Kohima, Metsüremi/March 22 (TYO): Yimdak yimtsüingtem nungi lendi nung yokyatsüyartem state yimtiba Kohima aser Dimapuri shishilembatsü atema oliora nung teyari agütsütsü Entrepreneurs Associate (EA)-i tanü parnok atema bus service ka tenzüksüogo aser item tetsürtem nem loan aser bonus dena agütsür.

Nagaland Minister for Planning and Coordination, Land Revenue and Parliamentary Affairs, Neiba Kronu-i TT Stadium Pfutsero nung bus service tenzüksüba sentong moaja liasü.

Tembartem teyari nung Entrepreneurs Associate (EA)-i Women Street Vendors Bus tenzüksüogo aser kasa mapang nung Minister Kronu-ia, yimtsüing balala nung shishilembartem ket nungi parnoki tsünütetba chiyotsü aser osetsütem bendena Pfutsero-i bener arutsü atema EA nem pick-up gari ka agütsütsü nangzük.

Iba anogo tetsür shishilembar parnok 14 nem EA-i bonus sen 2000 (nisungshia) agütsü. Parnoki sen 10,000 junga bendentetba atema iba bonus agüja liasü. Iba senpet ya minister kinungtsü Lanu Kronu-i amokja liasü.

COVID-19 wara agi tetsükdaaktsü bener arutsüba



Phek district kübok Pfutsero jila nung March 22 nü Minister Kronu, aser pa kinungtsü Lanu den CEO EA Duolo aser tanga ketdangsertem, tetsür shishilembartem atema EA bus service tenzüksüba sentong nung tangokba noksa nung angur.

sülen shishilemba tenzüksütsü asoshi EA-i tetsür shishilembar 60 nem tetemlok magi sen 25,000 aputsüogo. Iba teyari asoshi tembartem ajanga EA-i sen lakh 30 benden, kong Minister Kronu-i LADP fund nungi sen lakh 5 agütsüba densema lir.

Sentong nung o jembiba mapang Minister Kronu-i, 2001 küm nungi tenzüka tetsür shishilembartem aser entrepreneurs tem anepaluba atema EA nem tenüngsang agütsü.

Iba sentong ya kanga tongtibang kechiyong nüburtem rongsenketsüing ajungkettsü atema entrepreneurship ya lenmang tajungtiba ta shia pai

yimdak yimtsüing nung alirtem nem jila balala nung shishilembatsü atema maongka agütsütsü ta ashi.

COVID-19 wara sülen Nagaland sorkar-i rongsenketsüing ajungkettsü atema aluyimba ajungkettsü asoshi kanga süoki-ia shisadangdar, ta ashiba den nüburtem dang ali nungi züsenteta chiyoktsü atema tanaben meyipa aotsü ajungshi.

Local MLA, Kronu-i ashiba agi, aluyimba nung dang Phek district-i state nung tanga district tem den tokteptetsü. Paisa, Kohima aser Dimapur nung Phek district nungi shishilembartem atema tesem mekazükogo aser

shishilembartemi parnok indang chiyongtsütem hopta ka atemabosa rizünga yutettsü atema cold room anabosa agütsütsü, ta metetdaksü.

Shishilembatsü atema tesendaktep kanga tongtibang ta shia minister-i, district nung lenmang yanglutsü atema tongtibang project pongu benokogo aser iba ya yanglüzükba sülen küm ana tsüngda Phek ya state nung lenmang tajungtiba aliba district akümtsü aser iba ajanga rongsenketsüing nung teyari agütsütsü, ta ashi.

Iba dak sendakba nung Kronu-i aluyimertem dang jila balalai parnoki tsünütetbatem tonga yoktsü asoshi sentong

tapet yanglutsü ayongzük.

Sorkari Delhi tashi indang indanga air cargo service tenzükogo, ta shi pai aluyimertem dang state adena parnoki tsünütetba chiyongtsütem yoktsü atema iba amala maongka agitsü ajungshi.

Kasa mapang nung pai, aluyimertem dang tali adokdaksütsü atema inyakttsü ayongzük aser sorkari parnoki tsünütetbatem ayoktsü asoshi shishilembak bushitsütsü, ta ashi.

Minister-isa yimtsüingtem nungi chiyongtsütem bendena jila balalai yoktsü asoshi Bolero pickup ka agütsütsü nangzük.

EA Chief Executive Officer Neichute Doulo-i, yimdak yimtsüingtem nungi shishilembartem, shirnok local economy guardians tem lir, parnoki Kohima aser Dimapur tonga aotsü atema transportation tajung agütsütsü mepeshia aruogo, ta ashi.

State nung organic aonsotsütem ya tetsür shishilembartem ket nungi angur, ta pai ashiba den parnok senzüsenpongtsü atema Nagaland State Transport (NST) services dak metaloker alir saka temulunglemtsü mali aser ibayongji parnok indang aonsotsütem aiben intokatoktsüsa akümer, ta ashi.

(Maneni tapak 2 nung...)

Dimapur nung Power distribution Sub-station ka semzük



Dimapur, Metsüremi/March 22 (TYO): Advisor, Power, Tovihoto Ayemi ajanga March 22, 2021 nü Forest Colony, Dimapur nung aliba power distribution 33/11kv sub-station ka lapoktsüba den külemi pre-paid metering system tenzüksü. Iba sub-station yagi power 2x10 MVA agütsütettsü. Iba sub-station tasenba ya central sorkar indang Integrated Power Development scheme kübok yanglu aser Dimapur electrical division kübok ibai distribution sub-station 10 puba alitsü.

Iba sentong nung jembiba mapang, ibai Power department atema takok tulu ngutetba kisüng masü saka Dimapur nung aliba nüburtem asoshi alizüng tongtipang ka lir, ta Tovihoto-i ashi. Forest Colony

Sub-station commission asüba ajanga Metha Sub-station, koba küm aika demand onsara akumba ajanga timtem balala ajurua arur, iba sub-station indang load tajemba akumtsü.

Iba sub-station tasenba ajanga power supply tajungba akumtsü aser jila nung alirtem asoshi masüba mapang power aiba tajemba akumtsü, ta pai ashi.

Pai ashiba agi, linük ajunga nung consumer ajaki pre-paid meter amshitsü atema India sorkari lemtet. Asenoki pre-paid metering system dangi melentsüba dak alaka danga kecha mali, ta pai ashi.

Pre-paid metering system nung tajangzük aliba indang nüburtem nem shisa agütsüba mapang lenirtem aser lokti

tentet balalai Power Department den amalitem akatsüla, ta pai ayongzük.

Pre-paid meter ya Marwari Patti area, Dimapur nung pilot scheme ka ama 2014-15 mapang benpk. Küm trok lir tang iba pre-paid meter ya Dimapur yimti kübok danga tesemtem nunga amshitsü aser Kohima nungbo taoba küm nungi amshir.

Dimapur nung power auya atsükba ya kanga bulua lir, aser Power department kisügi iba ama tim masüba mapa inyakba menokdangtettsü, ta Principal Secretary, Power, KD Vizo-ia ashi. Pai nüburtem dang state nung power tajungba kumdaktsütsü asoshi department yaritsü ayongzüka liasü.

Department li merakzüksüla: Department of AH&VS

Dimapur, Metsüremi/March 22 (TYO): Department indang ali rakzükba dak sendakba nung April 29, 2016 nung osang ka sangdongba den bendenloksema Department of Animal Husbandry & Veterinary Services, Nagaland, Kohima ajanga March 22, 2021 nü sangdong ka ajanga ashiba agi, Medziphema nung aliba Veterinary Field Assistant Training Institute, Piggery Farm, Poultry Farm, Cattle Farm temeket aser shiruru

nem ayi tsünütsütsü asoshi lateta aliba alu nung densema nija aser telok balalai Department indang li maneni agir.

Item Institute aser ali ya sorkar meyong lir aser nüburtemi tashiyim agi ali agiba mechi Department kübok item li ya ayutsü kanga tasak akumer, ta Department of Animal Husbandry & Veterinary Services sangdong ka ajanga ashi.

Institute/farm pezü ya sorkar meyong lir aser item li

samaa aoba ya stakeholder asoshi tetsükdaktsü aser tarutsü asoshi timtem alitsü. VFA nung certificate course agütsütsü asoshi VFATI, Medziphema ya reju tajung ka lir, saka ali agiba ajanga temeket menentsüogo, ta Department ajanga ashi.

Anungji Department ajanga nübur ajak dang iba ama ali rakzükba mapa nungi pila alitsü ajungshir, kechiaser ozüng agi melaba ama tang tashi item li ya Department meyong lir, ta sangdong ajangasa ashi.

Mokokchung nung Poshan Pakhwada camp ali



Social Welfare Department (ICDS) aser Medical Department lungjemer Sub-centre Salangtem Ward, Mokokchung nung March 22, 2021 nü Poshan Abhiya kübok Poshan Pakhwada Camp ayongzükba mapang tangokba noksa ka yangi angur.

Dimapur, Metsüremi/March 22 (TYO): Social aser Medical Department

lungjemer Sub-centre Salangtem Ward, Mokokchung nung March 22, 2021 nü Poshan Abhiya kübok Poshan Pakhwada Camp ayongzüka liasü.

Severe Acute Malnutritions aser Moderate Acute Malnutrition (MAM) jangjatettsü, Children Screening aser tetsürtem rongnung Anemia anepaluyim angazükdaktsütsü nükjidong nung iba camp ya ayongzüka liasü.

Iba Camp nung Dr. Kibangkumba Dy.CMO Mokokchung ajanga Poshan Pakhwada indang rateta ashi.

Kohima indang Local Examination Committee senden ayonger

Dimapur, Metsüremi/March 22 (TYO): HSLC aser HSSLC Examination agitsü aliba dak sendakba nung Local Examination Committee pur senden ka March 24, 2021 nikongdang 2:00 ako nung Deputy Commissioner Office Kohima indang Conference Hall nung amentsü, ta Deputy Commissioner Kohima, Gregory Thejawelie-i sangdong ka ajanga ashi.

Iba dak sendakba nung

Examination Committee züngsem ajunga senden nung medema arua adenstü asoshi Deputy Commissioner Kohima ajangasa metetdaktsü.

Social Welfare Department (ICDS) aser Medical Department lungjemer Sub-centre Salangtem Ward, Mokokchung nung March 22, 2021 nü Poshan Abhiya kübok Poshan Pakhwada Camp ayongzükba mapang tangokba noksa ka yangi angur.

ICAR Nagaland Centre nung World Water Day amung



asenoki kidang kecha meinyaktet, ta lai ashi.

Nagaland nung pa-sasa tzünglu aser tzi taluposa angur, saka tzi ya timba mebendeni amajok nung indoker, ta Dr. A. K. Sangwan, Dean, College of Vety. Sciences and AH, CAU, Jalukie ajanga ashi.

Pai tzi benden ayutsü tesemtem yanglutsü atema jembi aser alu, kiset shiruru metsüba aser industry nung tzi kanga kumdanga amshitsü indang jembia liasü.

Northeast nung ali rongsen nung sorkar masü juri mesüra kin-kidong kibur lir, anungji asenok ajaki itemji kanga junga anepalutsüla, ta pai ashi.

Dr. S.V. Ngachan, Ex-Director, ICAR Res. Complex for NEH Region, Meghalaya ajanga sentong nung jembiba mapang, tarutsü putu atema tanü asenoki tzi wazüka ayutsüla aser Tsüngremi asenok nem agütsüba mashi-mashi mamshitsüla, ta ashi.

Tzi wazüka ayutsüba ya asenok akaji tenzüksüla aser iba tajangzük ya küm ana tsüngta nung angutsü. Asenok ajaki süngtong ka-ka temtettsü aser ibaji ajanga tarutsü nung tzi mopung agi anünga malitsü, ta ashi.

Dr. D. J. Rajkhowa, Joint Director, ICAR Nagaland Centre ajanga sentong nung adener pela agizük aser state nung tzi aliba indang metetdaktsü. Paisa tesem balala nung tzi rizünga ayuba nungi angazüksü ashi aser tzi kanga kumdanga amshitsü ayongzük.

Sentong tembanga Dr. L. K. Baishya, Principal Scientist (Agronomy) ajanga tepela ankep o jembia liasü.

Minister Kronu-i tetsür... (Tapak 1 nungi...)

Lendi nung shishilembartem melira aluyimertem aika kangshitsü, ta pai ashi. Ajak ajangzüksü atema EA aser tembartemi bus ya agütsüogo aser iba ya lendi nung shishilembartem atema mejeta amshitsü, ta pai ashi.

Paisa, iba bus ya EA-i küm asem anepalutsü aser shishilembartem ajung asar bus nung senzüba jenjang atettsü. Iba bus ya hopta nung pezübenbosa Pfutsero nungi Kohima adena Dimapur-i oli aruli ta senzütsü, ta ashi.

Maneni sentong nung shishilembar Nutsulu Thuluo-i la

tajangshiba lemsatet aser Chakhesang Women Welfare Society project coordinator Tekhewetsolu-u Wezah aser Chakhesang Mothers' Association tir Zhonelu Tunyi natia tetsür shishilembartem ajungshia liasü.

Iba bus ya Chakhesang Baptist Churches Council executive secretary Rev Khrotso Mero-i meshiteta sarasademsüba sülen Minister Kronu-i tenzüksü.

EA kübok state ajunga nungi lendi nung shishilembar 2,600 züngoksema lir, ta Administrative Coordinator, Yutho Sangtam-i metetdaktsü.

BJP-i Assam nung yimjung aser terenlok bener arutsüogo: Amit Shah



Jonai, Metsüremi/March 22 (Agencies): Union Home Minister Amit Shah-i Hombarnü, taoba küm pongu tsüingda BJP-i Assam nung yimjung aser terenlok bener arutsüogo, ta ashiba den Congress yimsüsüba mapang azütokshi aser state mesüingjemteti aliba dang nungi state khenyongi balaka kümogo ta ashi.

Assam nung tanü mezüingbuba rally nung o jembiba mapang Shah-i, küm pongu tejakdang Congress-i yimsüsüa liasü aser iba mapang longkak aitba, azütokshi, bomb apokba, tasüba aser curfew kanga liasü, ta ashi.

"Rahul Gandhi-i, Assam maitsü aser meraket wazüka

ayutsüba indang jembir, saka tanü ni pa dang yimjak nung Congress-i AIUDF tekolakba Badruddin Ajmal parnok tepima nung mener iba tenangzükba ya inyaktettsüna ta asüingdangner," ta pai ashi.

Tia kaa Ajmal tashi dangi arura, "Assam bendanger nungi kümzüka toktsütettsü asü? nüburtemi state-i bendanger tali arudaktsüner asü?" ta pai ashi.

Paisha, Congress-i lemdanger yimsü asüba inyakyim benoka inyakba aitsüba den BJP policy bo 'Sabka Saath, Sabka Vikas and Sabka Vishwas' lir ta ashi.

Congress-i Assam nung aser Bengali nung, tenem nung alir aser lenden nung alir, Upper aser Lower Assam nung

alir tsüingda mangatettep adokdaksü, ajisüaka BJP-i kin tilala ajak terenlok ajanga longjemdaksüogo, ta Shah-i ashi.

"Nüburtemi yimjung aser terenlok aginer maginer aji iba election nung lemtettsü. Iba election ya MLA mesera Chief Minister ka shimtsüba atema masü saka terenlok maparen aser Assam meraket mesamadaktsüi bener aotsü asoshi lir," ta pai ashi.

Paisha, nüburtem tejangraba dak ajemdaker Assam nung BJP-i sorkar kümteettsü temulung lema bilemba lemsatop.

Jonai dak alia Shah-i Majuli aser Udalguri nunga nüboyimba sentong nung shilem agia liasü.

Assam nung double-engine sorkar menüingdaker: Priyanka



Guwahati, Metsüremi/March 22 (Agencies): Assam nung election magi tsüingda nüboyimba sentong nung shilem agiba mapang Congress lenir Priyanka Gandhi-i asendenshir Bharatiya Janata Party (BJP) aitsüogo.

BJP-i Assam nung taoba election mapang nangzükbatem mataloktsüba aija Priyanka Gandhi-i, Assam nung chief minister ana den double-engine sorkar menüingdaker ta ashi.

"Assam nung chief ministers ana den double-engine sorkar nüingdaka mali," ta Con-

gress lenir Priyanka Gandhi-i ashi.

Priyanka Gandhi-i iba olen ya Assam, Nagaon district kübok Kaliabor tesem nung Congress party nüboyimba sentong ka agiba mapang ashi.

Assam nung BJP-i aniba sorkar aija Priyanka Gandhi-i ashiba agi, Assam nung aliba nüburtem küm pongu tashi saf-ron brigade-i mezüingmeshiogo.

"Parnoki taoba küm pongu nung kechi inyak? Assam nungertemi CAA maginü, saka BJP-i nüburtem tejangraba sentong toktsür iba ozüing

odang benok," ta Priyanka Gandhi-i ashi.

"Assam tzümetsüing agi timtemba mapang PM-i state semdanga tzümetsüing agi kongshir aliba nüburtem den sensak asem asü? CAA anema longkak aitba mapang tai maketba nisungtem taküm laluba asadangtsü atema PM-i Assam semdang asü? Masü," ta Priyanka-i shisem.

Nüboyimba sentong nung shilem agiba sülen osangbenertem den sensaksemba mapang Priyanka Gandhi-i, Congress rara ya BJP anema dang masü saka saffron party indang tebilemdangba anema lir, ta ashi

"Congress-i BJP sorkar anema dang masü saka parnok tebilemdangba anema longjemer kanga meranga raradar," ta Priyanka Gandhi-i ashi.

"BJP-i Assam nung aser maitsü mezüingmeshiba anema onok rarar," ta lai shisem.

"Congress party aser Assam lisopurtem longjemer yimji yimjung aser terenlok bener arutsü," ta Priyanka Gandhi-i ashi.

Tripura nung nisung 20 dak Covid-19 tashidak putet

Agartala, Metsüremi/March 22, 2021 (Agencies): Tesüiba anogo asem tsüingda Tripura nung nisung 20 dak Covid-19 tashidak tasen puteta lir.

Tripura State nung Hokolbar anogo nisung 10, Honibar aser Deobarnü nisung pungungu dak iba tashidak puteta liasü.

State Health Department indang Health Bulletin ajanga, tang Tripura nung Covid-19 tashidak puteta alir nisung 30 lir, ta metetdaksü.

Taoba hopta Tripura State nung nisung 30 tema dak iba tashidak agi kongshiogo.

Ajisüaka, tang Covid-19 tashidak tasen puteta alirtem ya mozüki nung masü saka pei pei kidang anepaludaki.

December 2020 nungi February 2021 tashi Tripura nung COVID-19 tashidak putetba kanga ajema aküm.

Ano külen Covid Care Centre ajak sorkari shibangtsüogo, saka Agartala kübok GBP

Hospital kisüing nung Covid Centre lapoka lir.

India nung tanga tesem ama, tesüiba hopta ka tsüingda Tripura nung COVID-19 tashidak tasen maneni adokdar.

State nung iba tashidak pokteter külen nungi, tanü tashi iba tesashi wara ajanga nisung 388 taküm samaogo.

Health tsütsü mongintemi, linük ajunga nung Covid-19 tashidak azüoktsü atema tesem balala nung lokti tululu adenshiba ajemdaktsütsü, Covid-19 vaccine agütsüba sentong takaraba nung tembangtsü aser nüburtem maneni COVID-19 temzüing nung anidaktsüla, ta asadangteter.

Maneni, Tripura State nung Tripura Tribal Areas Autonomous District Council (TTAADC) election atema renemshidar, saka election atema nübuyimba sentong nung nüburtemi mask magii/ meinoki shilem agiba nguogo.

Nadda-i party mapatong sangdongtsü

Guwahati, Metsüremi/March 22, 2021 (Agencies): Aruya aliba Assam Assembly elections atema March 23, 2021 (Mongolbarnü) BJP-i parnok indang mapatong sayatsü terenemba lir.

Guwahati nung Party indang national tir JP Nadda-i BJP manifesto sayatsü.

Hombarnü, JP Nadda Assam tonga arutsü aser pai Dibrugarh, Jorhat aser Biswanath Charial tesem nung nüboyimba sentong ayongzüktsü sentong lir.

Assam Legislative Assembly nung züingsem 126 atema election ya March 27, 2021 nungi April 6, 2021 tashi shilem asem lemsar agitsü. Iba sülen May 2, 2021 nü election result

sangdongtsü.

Deobarnü, Union Home Minister Amit Shah-i West Bengal Assembly election atema BJP indang manifesto sayaogo.

West Bengal election atema sayaba manifesto nung, BJP-i Citizenship Amendment Act (CAA) amenoktsütsü nangzükogo, koba Assam nung telok tentet balala aser Congress densema opposition telok temi iba maparen anema kanga sashia nokdaka arudar.

Iba manifesto nungsa, 'Sankalp Patra' tetshia lir, koba West Bengal nung tesüiba küm 70 tashi jenoka alir refugee tem nem India senso agütsütsü indang mapatong ka lir.

Tzü shisaka amshitsü Conrad-i ayongzük

Guwahati, Metsüremi/March 22 (Agencies): Hombarnü alima ajunga nung "World Water Day" amungba mapang Meghalaya chief minister Conrad Sangma-i, nüburtem dang tzü küm danga amshitsü ayongzük.

Meghalaya kübok Mawsynram tesem ya alima nung tzüinglu timtiba aruba tesem ka, süaka state kübok tesem aika nung tzü temerek agi anünger.

Sangma-isa, nüburtem dang tzü kümzüka ayutsü atema shisaka jenjang agitsü ayongzük.

"World Water Day" ya

alima ajunga nung tzü temerek wazüka ayutsü atema nüingdakba angatetdaksütsü nükjidong nung küm shia amunger.

Taküm iba anogomung omenji "valuing water" liasü aser iba ajanga tzü wazüka ayutsü nüingdakba dak tali rangloker, kechiyong tanüa alima nung nüburtem aika tzü temerek agi anünga lir.

"Asenok taküm ya tzü dak metaloker alir aser iba ya wazüka ayutsü atema asen dak keta lir. Asenoki shisaka inyakti. WorldWaterDay2021 #ValuingWater," ta Conrad Sangma-i tweet asü.



TIR YIMYIM YIMOBILEM (EDITORIAL)

DIMAPUR SANGTENNÜ, METSÜREMI (MARCH) 23, 2021

Alu nung lia ayimba

Tanü asüng asenok asentenshitsü nüngdakba tesem kaji aluyimba mapa ya ka lir. Asenok akhi tsürabur mapang nungi aluyimer kin saka asenoki putu tensa den apet inyakyim tasen apiteta alu ayim mashiba agi, aluyimerbo aluyimer saka chiyongtsü maka anüngakonga sensaker kümer kanga timtema lia arur. Iba jagi tangarbo aluyimera takarba saka asenokbo aluyimera tesensakba ta aluyimba mapa agi nümamedangteter. Aji oda, asenok asoshi aluyimer tetezüji sensaker, anungji akhüm maket kumadoker. Iba tangatetba aser tetezüji melener, asen lima nunga aluyimerji takar, taputsür aser tayoker kumdakja inyaksübaji asenok ajak külem teinyaktsü lir. Asenok asoshibo aluyimba mapaji tsük, aonsutsü aser süngjanglijang lu ayimba mapatem ya dang lir ta angateter saka aluyimba mapaji ali nungi nisungtem asoshi chiyongtsü adokdaksüba mapa ajakji aluyimba mapatem lir, anungji shiruru metsüba aser ango tzübo tua ango metsüba mapa ajakji aluyimba mapa asütsü. Tanübo asenoki item aluyimba mapa ka nunga takok ngua meinyakteter, iba kuliji asenoki mapayim memetetba agi mesüra azümasenba ajanga lir. Ano, tanü asoshibo junger saka tarutsü atemabo asenok asoshi majung kaji, sen asem agi jang seret ka anguba sentong ya lir. Atangji, ibai India nung kangasa sensakertem aya agi masütsü atema government-i yariba sentong tajung ka lir, ajisüaka asenok asoshibo iba teyari agiba ya asenoksasa asenok ashiochtsür amai akümer, kechiyong asenok asoshi jang seret nung sen asem agi alia chiyonga alitsübaji kanga melamelar, iba jagi asenok shisamebolur, anungji alu mayimer. Aji oda, asenok ya memeteti India government-i sensaker nem jenjang dalang agi agütsüba 'relief jang' chiyonga kazür kin ka kumogo. Ibaji kodang jungjunga bilemdangdir, asenok tia ya ak shibanga yur mapang shitak nung chi agüja mesüba den kasa medemdangtetsü. Iba jagi asenoki asen peria mesenzütetter, business mapatema tenzüka moutetter aser lanurtem rongnunga civil service tatidang nung tangar adoksaa takok mengutetter. Ibaji kecha meinyakyonga relief jang tebok sünga chiyongtsü anguba agi asütsü südi. Ajisüaka, asenok asoshi relief jang angubaji mapa meinyaki chiyonga kazütsüba masü saka tang ama asenoki asen peria mezüsentedtba mapang, iba chiji chiyonga meranga inyakba mapang ka asütsüla. Koba teyari südirsüaka, government nungi aruba 'relief jang aser relief sen' ya teti atema masü khenbo anena adoktsü. Aji oda, relief jang mangu nungbo asenok taküm melitetsüsaba jenjang nung asenok lia lira, India goverment lar shitakbaji asenok asütsü. Iba alar tia nung jagi adoktsüabajibo telok telok kümer prangpong injang amshia raraba agi masü aser public rally ayongzüka akaba agia masü saka asenoksasa asen lu nung lia alu ayimba ajanga dang nüchi kuma adoktettsü. Aji oda, tang state government-i Naga Integrated Settle Farming (NISF) inyakyim ka tenzüka aluyimba maparen nung aluyimba mapatem reprangba department-tem ajak longjemer alu ka nung akok tashi tsük aser aonsutsü adokdaksüba den külemi, ano kiset shirurutema aser ango-a metsütsü sentong tenzükbaji takok angutsü ta bilemer. Kasa aluyimba mapasa süaka department aika kuma lemsaba agi ketdangsertem aika aküm aser ketdangser aika asüba agi aiben mapa inyaksü lemsükba sen agi mapabo tetenzüka metenzüktet agimadoker. Tangbo iba amaji mesüi ketdangsertemia shitak inyaksü aser aluyimertemia nendaka inyaksü ta asenoki asenoksasa tangar ajaki nükshia akümtsübuttsüsa, chiyongtsü tapu balala züsentedta aser yangluteta nübortem peria agütsütetba aluyimertem akümtsüla. Atangji, government nungia teyari manguyonga, kodang asenoki asen lu nung lia, alu agi yim kümer yang nung jagi nübortem peria chiyongtsü züsented tenzükdir, indangyongjisa asen lima ya ochishir lima kumadoktsü. Idangjibo mesaruyonga agütsütsü, anungji lokti aser arogo ajak takar akümtsü. Ajak peria aka nungji, asen lima ya auer ashir maliba lima kumadoktsü, anungji akhi ochi putu nung ama asenok kidang dala mamshitsü. Idangjibo, Clean election otsüa mejembitsü, kechiyong election mapatema pasasa merüktetadoktsü. Item mapa tajung ajakji asenoki asenoksasa alu takok ngua yimtetba nungi tenzüksü.

OLEMSABANG

TENSA DEN PETA CHUBATEM KAKET AZÜNGBA

~ Dr. Temsüyanger, CTC, Aolijen

(Yashi adok nungi...)

Item temelenshi dak alaka ano Solomon-i pa yimsüsüba inyakyim nung menden tasen ka benlok, Chuba (The Sovereign)

Tongti (Chief ?over the officials) Azariah, - Nathan chir' (I Kgs. 4:5) Governor-tem Ali melen sarurtem (local level officers).

Laishir mongintemi ashir, iba ya Solomon-i iba menden nungdakba atema benlok. Tongtibang mapaji ali melen saru melok (tax) bendentsü asoshi dang masü, saka chubai lemsüktsüba mapatem inyaksü asoshi iba menden benok.

Chubar langpang aser kibong acha-ayangtsü asoshi item provincetem nung governor-tem ter-ana khuret liasü. Item governor-temi par nüburttem dak nungi chubai nungdakbatem ajunga akhang. Anungji, Solomon yimsüsüba yimli tasen ajanga nüburttem, talisa, yimtsüng nung aluyimertem ajunga asoshi khuret tuluka aküm. Aluyimertem-i ali nungi züsentedta teimba chubar langpang asoshi, aser pa sentong balala nung amshitsü asoshi sarua bener oadok. Aluyimba nungi adokba aika tangar yimli dang yoktsü asoshi chubai sarua bener oadok. Anungji aluyimertem aika tekupoktiba jenjang-i ludaktsü.

Solomon-i temeranger sepaitem aika yutet aser item ya tashi tulu liasü. Ibai ajanga nüburttem temulung nung longkak aitaka aser taittsüba liaka Solomon-i nokdangtet. Anungji Solomon mapang nüburttemi pa anema noktakba otsü nung shia mangutsü, kechiaser pai ozüng kübok aser sepaitem tashi kübok nüburttem ola madokdaksü-i yutsütet. Saka Solomon süli Israel kin-kidong aika pa chuba yimli doktsür pakzüka oadok.

Solomon Rongsen (I Chubatem 4:20-5:8)

Chubatem kakete zülur Deuteronomists-i Solomon chuba shisa akaba aser pa rongsen akaba ajanga alima chubatem ajungai pa mera keta reprangba aser penbuba indang shia angur. Solomon ki aika liasü, pai Yirusalem tenlaki tesüngmangtsü sentsüwangshia aser merena yanglutet; anungji Yehovah Tsüngremi pa dak saklok ta iba tangatetba nung kakete zülur jagi shia angur. Saka laishir putishir aikati ashir, Solomon yimsüsüba nükjidongji rongsensüba tashi ita yanglutsü nükjidong liasü, aser ibaji ajangzüksü asoshi pa yimsüsüba asa-lendong rongsen bendentsü aser aji pai ajangzük.

Laishir mongin, Marvin Chaney-i yamai ashir, Solomon ki yangluba sendong aser temeranger sepai tashi ita ayuba sentong ajanga külenbo nüburttem tajemrepba aser makamait tia-i tali idaktsü. Solomon chubai ki yangluba, temeranger sepaitem anebaluba, konang nüngsang aser lalushipong nung temulung agütsü. Anungji kodang merang (iron) putu Israel nung nüburttemi ngutet, item merang balalatem aluyimba nok nü yanglutsü melena, chuba sentong aser pa mapalenang merangtemji amshi. Anungji nüburttem aluyimba nung tangar memenepi liasü. Aji saka chuba aser pa medemsortem aluyimertem dak nungi ali rongsen akhang, aji asü nung aluyimer aika tepok tazüng kumadaksü.

Kodang chubai tsükchir linüktem maktetba ali-lumangtem pa keti aru, laishirputishir kari ashir, chuba meyong ali-lumang aser alu balala aika (ladifundia) aküm. Item alutem nung chubai süngjanglijang, süngdonglidong aika tsünü, süngjanglijangtem adokba ajunga tangar nüburttem den shishilembaba nung chubai amshi. Talisa, item alutem nung inyaksü asoshi chuba ozüng ajanga pei nüburttem nübu aika akhang (force labour).

Solomoni Nüburttem Nübu Tashiyim agi Akhangba (I Chubatem 5:13-18)

Iba tapak nung ashir, Solomon chubai Lebanon nung nüburttem mapa inyaksü meyi semer Israel ajak nungi aniten. Laishir mongintemi ashir, ibai nübu 10,000 ita nung tata indang ashir. Ita ka parnok Lebanon nung chuba asoshi mapa inyaksü, aser ita ana pei kidang mapa inyaksü. Nüburttem dang Solomoni ali melen saru akhangba khuret tulu liasü, ano iba dak alaka Solomoni pei nüburttem dang nungi Yirusalem tenlaki yangluba mapa nung nübu akhangba asenoki angur. Laishirtem kari ashir, kodang Kanaan nung tepouker nüburttem nübu agi meperi aküm Solomoni pei nüburttem dang nübu akhangtsü tenzüka, aser yamaji parnok chuba ozüng agi Lebanon nung süng-lung mapa inyakdaksü.

Hiram chuba aser Solomon chuba yimjung nung liasü. Solomon asoshi ki yanglurtem den Hiram atema ki yanglurtem aser Giblites nung külemi süng aser lung agenteta Solomon-i ki yangluba mapa nung külemi inyak.

Otsüi ashir, Dawid-i pai maktetba tsükchirtem dang nungi tang nübu tashiyim agi agia amshi, anungji pai par tejen sobalibaren aser lenirtem akhümtsüba liasü. Saka kodang Solomon chuba aküm, Solomon-i tebu ama meinyak, saka pai pei nüburttem nungia iba tashiyim nübu amshiba ajanga nüburttem tali tajemrepba tia-i idaktsü.

Yimtsüng nung aluyimertemi Solomon-i ki yangluba sendong ajanga kodanga tajangzük mangu. Kechiaser parnok dang nungi ali melen meshitenba, aser parnoki temeranger sepai raraba ajanga, item sentongtem Solomoni pa asoshi inyak. Linük rongsen ajungai chubar kibong aser par medemsortem dang tajangzük angu. Nüburttem aser alinük kumzüka wazüka tsükchirtem nungi alitsü mechi nüburttem dang rongsen akhang, aser yamaji chuba aser pa medemsortem dang tajangzük angu.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung Khristan ka nem tasüba temerenshi obendang agütsü



Pakistan nunger Khristan, Sajjad Masih (abelen nungi tasembuba)'er kibong tamalen tangokba noksa nung angur.

Lahore (Pakistan), Metsüremi/March 22 (Agencies): Pakistan linük nung Islamist legal telok kati mepishiba nung ajemdaker March 10, 2021 nü Lahore High Court-i tamalen Khristan ka taküm piyong tepoukdak ayutsü obendang agüja aliba melenshia pa nem tasüba temerenshi ang agütsütsü obendang agütsüogo.

2011 küm text message ajanga Tsüngrem mezüngmeshiba ken o ka nung court-i pa aija liasü.

Isamic telok- Khatam-e-Nabuwwat Forum (KNF)-i high court dang criminal code revision asütsü aser aija alisang nem tasüba temerenshi ang agütsütsüla, yamaji mesüra item ama ken o kanga bulua ataloktsü, ta mepishiba nung ajemdaker court-i obendang melenshia temerenshi tuluba agütsütsü lemtet, ta osang angazüker.

Pakistan nunger arrshi küm 36 Khristan, Sajjad Masih'er kinüngertemi ashiba agi, Justice Malik Shahzad Ahmad Khan-i Islamic teloki mepishiba agizük aser Masih-i mepishiba ken oji division bench ka nem agütsü.

"KNF lawyer temi rongshiba paidoktsü atema Justice Shahzad-i temepishiba ken oji division bench ka nem agütsü. Tetsübu ajanga iba temepishiba ken o ya menoa mangadangtsüa akok," ta osang ka ajanga metetdaksü.

Küm tenet tejaklen Masih-i Lahore High Court nung temepishiba ken o ka agütsü, aser iba ken oji tang tashi mangadang.

2011 küm December 11 nü Masih-i Muslim nunger ka dangi tashishitsü text message yok, ta tai tongloksüba ken o nung 2013 küm July ita nung trial court kati Punjab Province kübok Gojra jila nung aliba Seventh-day Adventist Arogo nung züngsem, Masih taküm piyong tepoukdak ayutsü atema obendang agüja liasü.

Court-isa Masih dang senchi 314,500 agüjang ta tuyua liasü.

Maish-i mepishiba ken o aser KNF-i mepishiba ken o naprongla angadanga mapang nung court nung KNF lawyers aika liasü, aser ibaji tanga kecha masü saka obendanger rongshitsü atema liasü, ta nisung kati metetdaksü.

"Parnoki (KNF) obendanger dang Islam nunger ainkar mezüngmeshiba atema tasüba temerenshi obendang ang agütsütsüla, aser tekaraba nung Sajjad tepsettsüla ta mepishi," ta kasa osang ajanga metetdaksü.

Blasphemy ozüngtem kübok Arrla 295-C nung ajemdaker Masih aitsü; Iba Arrla nung yamai shia lir, "Shibai o agi mesüra tezüluba ajanga ainkar Muhammad mezüngmeshidir tasüba temerenshi agütsütsüla, mesüra taküm piyong tepuokdak ayutsüla, aser senchi-a achitsü temsüa lir."

Ajisüaka 1991 küm Federal Shariat (Islamic) Court-ibo Tsüngrem mezügmeshiba atema tasüba temerenshi dang agütsütsüla ta lemteta liasü. Iba nungji ajemdaker KNF nung Tir aser attorney, Ghulam Mustafa Chaudhry-i "Tsüngrem mezüngmeshirtem nem tasüba temerenshi dang agütsütsüla. Tanga lenmang mali," ta takhangba agütsü.

Küm 20 jakdang KNF tentetba sülen Pakistan kübok Punjab province nung Khristantem densema minorities aika anema Tsüngrem mezüngmeshiba ken o benokba ya kanga bulua kümogo.

"Punjab Province tesem ajaklen Islam yimsü mesüra ainkar Muhammad mezüngmeshirtem anema ken o akatsü aser tepseta indoktsü atema Khatam-e-Nabuwwat lawyers aikati inyaka arur," ta osang ka ajanga metetdaksü.

Muslim nunger lawyer süaka Supreme Court Advocate, Saif Ul Malook-i

taoba mapang Pakistan nung Tsüngrem mezüngmeshiba ken o nung aija alir, Aasiya Noreen (Asia Bibi) atema jembija iba ken o takok ngua liasü. Paisa tasüba temerenshi obendang agüja alir Khristantem aika atema jembitsür.

Punjab Province nung Tsüngrem mezüngmeshiba ken o kanga bulua benokba ya Chaudhry aser pai aniba lawyers telok ajanga lir, ta shiogo.

Malook-isa, "Khatam-e-Nabuwwat lawyers-i amokmeren asalentong kanga benschir. Mapang ka nungbo pai ken o ka nung nisung ka atema jembitsüadang lawyers telok jagi pa nem timtem kanga agüja liasü," ta ashi.

KNF-i linük nung aliba lower courts aser higher courts naprongla nung amokmeren inyakyim benschir," ta pai ashi.

"Tasüba temerenshi obendang agüja alir apuani-Shagufta Kausar aser pa kinüngbu Shafqat Emmanuel (tenaprong Khristan) atema ni jembitsüdar, ajisüaka tenati mepishiba ken oji tesüiba küm trok tashi high court-i menotsür," ta paisa ashi.

Tang tashi nungbo Pakistan nung tsüngrem mezüngmeshiba ken o nung shinga nem-a tasüba temerenshi agüja mali, ajisüaka tasüba temerenshi obendang agüja alir Khristan aika tepuokdak küm aika yirua lir.

Pakistan nung tsüngrem mezüngmeshiba ozüngtem nung ajemdaker Khristan densema minorities nem tai tongloksür, loktii nisung tepseter aser longkak aiter.

Arogo lenirtemi aser meimchirtem temeden atema inyakertemi ashiba agi, tsüngrem mezüngmeshiba ozüngtem tim mesüi amshir aser yazü nung tai tongloksüba ajanga minorities kanga timtemer.

Tang Pakistan linük nung tsüngrem mezüngmeshiba ken otem nung aija Khristan 24 tashi tepuokdak lir.

ANOGO ABEN TSÜNGREM DEN

Shia aruba agi tasüba jenjang angatet

"Kechiyong Yisu taküm onok tasütsüba shih nung jungkai adoktetsü asoshi onok shir taküm lir, Yisu atema tasüba nem teti bendanga agüja lir." (II Kor. 4:11)

Asen kümtetdakba Yisu Khrista shia aruba nung temelenshi tulutibaji nütsüngtem taküm nung jungkai adoka liasü. Yisu kangki nung tepsettsü mapangbo parnok taküm samatsü asoshi kanga tsübu aser jenshia liasü. Parnoki Yisu rishikangshia anir senzü dang ojita nungi dang repranga liasü; shiangai Yisu kangki dena melenzüksüa na nung maliasü. Peteribo Yisu asemben tashi menangzükteti aküm. Saka kodang Yisu shia aru Yisu nütsüngtem taküm nung temelenshi tulu adok. Parnok dak tasü tait tanela poktet, marendaki Yisu shia aruba indang kuli asü, aser tepela agi asüng. Shia aruba temelenshi kechisa angur? Parnok taküm samatsü aser bendanga agütsütsü metsübui aküm.

Kechiyong Khrista asoshi parnok taküm samabaji tajangzük ta angatet. Tasübaji tatem ama mibilem, saka Khrista asoshi bendanga agütsübaji langkoshishi agi kangki nung südaktsü, Mathi noklangnok agi lepsetdaktsü, Philip tongshi tulu ka nung meta südaktsü, Barthloloma taküm dang taküp asa, Yihuda lasang agi kaset. Yisu shia aruba kuli agi pei taküm Khrista atema samatsü metsübui akümer. Naia ne taküm nung pa shia aruba kuli tajangja kar ma?

Sarasadem

Temeim Yisu na shia aruba ajanga ni Khrista nung asüba jenjang tali junga angatetogo. Ni na asoshi kü taküm bendanga agütsür. Amen

FNBA-i Arunachal Pradesh nung Khristantem yaritsü mepishir



Arunachal Pradesh kübok Longliang yimdak ki aika rongdoker aliba noksa nung angur.

Darogapathar (Dimapur), March 22, 2021 (Agencies):

Darogapathar, Dimapur nung amenoka aliba Fellowship of Naga Baptist Associations (FNBA)-i shidi ajanga Naga Baptist Associations nung Executive Secretaries ajak dang tawa Arunachal nung Khristan yimtsüng ka rongokba ajanga takoksa angurtem nem teyari agüjang, ta mepishiogo.

"March 19, 2021 nü anüngdang 11:00 ako nungi 12:30 tsüngda Arunachal Pradesh nung Tirap district kübok Khonsa nungi kilometer 45 shi pilar aliba Ollo Naga yim-Longliang nung ki aika rongdokba osang onok nem metetdaksü," ta FNBA General Secretary, Rev. H. Gideon-i züluba shidi nungji shia lir.


Iba lendong nungji ki 114 rongdok aser arrshi küm 65 tambur ka den arrshi küm 5 tetsür chanu ka asü. Mi lendongji komaser tenzükar memetet, ajisüaka ki ka nungi iba mi lendong tenzüka ki aika nung miji eploka ki aika rongdok.

Yimdak ki 140 liasü aser iba nungjagi ki 114 bo meshi-meshia rongdok aser item ki nungjagi osettsüset kecha magizükteti liasü, ta shidi nung shia lir.

"Tang kibong aika talidak makaba dang masü saka apen-süoshi aser chiyungtsü mali kanga timtemdar. Tang ama mapang ka nung asenoki sarasadem nung parnok bilemtetdi," ta shidi nung shia lir.

"Nenoki takoksa angurtem nem senotsü teyari mesüra teyari balala agütsütsü akok. Tang ama mapang ka nung Longliang yimdak asen adianutemi asen teyari kanga nüngdaker. Parnok taküm asentenshitsü atema asenoki yaridi. Kokra iba osang ya nenok kübok Arogotem den lemsatepang," ta FNBA shidi nung shia lir.

FNBA ajanga nenoki teyari agütsünüra nenoki FNBA Bank Account No. 0160104000080556 IFSC : IBKL0000160 ajanga senotsü tenla agütsütsü akok, ta FNBA-isa mepishia metetdaksü.

OLONG PAITEP # 5761

TIPLIN

- | | |
|----------------------------|-------|
| 1. Nisung jenti | - (5) |
| 4. Tsük rudenba | - (5) |
| 6. Temzüng tesashi | - (5) |
| 8. S _ _ _ i | - (3) |
| 9. Nisung telemsa | - (3) |
| 10. Anogoshi | - (4) |
| 12. Ajanga aor | - (4) |
| 13. Tsük rizüngdak | - (3) |
| 14. Tebang nungi adokba | - (3) |
| 16. Süngdong tatembangtiba | - (5) |
| 17. Meputep | - (5) |

LANGTSÜNGLEN

- | | |
|--------------------------------|-------|
| 1. Tenük telong | - (9) |
| 2. Committee dang ajar | - (5) |
| 3. Yagi ki okdoker | - (7) |
| 5. Yim lenmang | - (5) |
| 7. Temoatsü keter meyipa aruba | - (9) |
| 11. Kanga junga menemba | - (7) |
| 12. Majinü | - (5) |
| 13. Tzüma nung senzüba | - (5) |


OLONG PAITEP # 5760 TELANGZÜBA**TIPLÉN :**

2. Bangsemo, 6. Tiptem, 8. Jen,
9. Talila, 11. Aren, 12. Tzübo, 14. Alia,
16. Angati, 17. Odi, 18. Azü,
19. Sünqlang.

LANGTSÜNGLEN :

- LANGTISUNGLÉN :**
1. Yipten, 3. Nüja, 4. Sangro, 5. Milen,
7. Tulu, 10. Laza, 11. Aben, 12. Tiyong,
13. Ajizük, 14. Aitsü, 15. Tasa, 16. Aina.

Noksa nung meputepi aliba 12 bushiang



TANÜBO NAI LANGZÜANG

- Q. Koba küm NCC tenzük?**
A. 1948 B. 1947 C. 1946 D. 1945

===== (Taruba adok nung onoki langzütsü)

YASHI ADOK TELANGZÜBA : Abu Dhabi

AO OSHI ANGAZÜKDAK
TANÜ ANGAZÜKTSÜBA OJANGTEM



Tir Yimyim

Molu

(v.) Tzü tatsük kümdaktsüba
(heating/boiling water)

- *Onoki tzü chigutsü tzü molu.*

Aro

(v.) Totzū nung chiyongtsü mendaktsüba (fry)

- *Tetsürtemi anshi kanga junga aro.*

NAI-A YA METETTER MA?

Grammy Awards takok angur U.S. Tir asem - Barack Obama, Bill Clinton aser Jimmy Carter.

1. 39buba U.S Tir, Jimmy Carter-i 2007 kûm "Our Endangered Values: America's Moral Crisis"; 2016 kûm "A Full Life: Reflections at Ninety" aser 2019 kûm "Faith: A Journey For All" atema Best Spoken Word Album category nung Grammy Award asem angu.
2. 42buba U.S Tir, Bill Clinton-i 2004 kûm "Prokofiev: Peter and the Wolf/ Beintus: Wolf Tracks" atema Best Spoken Word Album for Children nung award anguba sûlen kûm ka lir Clinton-i ano "My Life" atema Best Spoken Word Album nung award agizûk.
3. 44buba U.S Tir, Barack Obama-i 2006 kûm "Dreams from My Father" audiobook atema Best Spoken Word Album aser 2008 kûm "The Audacity of Hope: Thoughts on Reclaiming the American Dream" audiobook atema Best Spoken Word Album Grammy takok angu.

SUDOKU # 5803

				6	3		9	8	5	9	1	6	2	4	7	8	3
9				7	4	1		5	3	6	4	9	8	7	2	5	1
					9				7	8	2	3	5	1	6	9	4
	2		1	4			6	3	1	2	3	5	7	8	4	6	9
8	1					2			4	5	8	1	9	6	3	7	2
	6		7		2				9	7	6	4	3	2	5	1	8
		3					1	2	6	4	7	8	1	3	9	2	5
		5	4			6	7		2	1	9	7	4	5	8	3	6
			9	2		8	3	4	8	3	5	2	6	9	1	4	7

TELANGZÜBA # 5802

OJANG LUTEP # 5347

ENTTSÜG	:							
EKTA	:							
LMBEEA	:							
IYKAAN	:							
JJAAR	:							
TMIE	:							
CHTAI	:							
JMTTASÜE	:							
PIAER	:							
GUARN	:							

OJANG LUTEP TELANGZÜBA # 5346

**YIMJAK NUNGBO KANGA MULUNGSOA YARIR
AMA SAYUR MESÜZÜKA AJAK AGIADOK**

TAN HOPTA ATEMA - KOMA SÜLA ?

- Q. JCPI teloki akangba ama tangsa tang 1963 kûm 1st December nung ajemdaker, Nagaland Senso Register (Register of Indigenous Inhabitants of Nagaland) ka lapoka Nagaland sensosanger tenüng zûluok tenzûk nunga koma sûla ?**

Olong 20 shi nung March 26, 2021 tashi nung iba telangzüba ya onok dangi (e-mail - tiryimym@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanqa yokang. Telangzübatemii taruba Honibarnü adoktsütsü.

PM-i 'Catch The Rain' campaign tenzüksüogo



March 22, 2021 nü Ato kionser, Narendra Modi-i New Delhi nungi Video Conferencing ajanga 'Catch The Rain' Campaign tenzüksüodang tangokba noksa nung angur.

New Delhi, Metsüremi/ March 22 (Agencies): Hombarnü World Water Day anogomong nung Ato kilonser, Narendra Modi-i New Delhi nungi video conferencing ajanga 'Catch the Rain' campaign tenzüksüogo.

'Catch the Rain' campaign nükjidadong ya tzunglu aruba mapang nung tzu bendena rizungtsü atema lir, koba ajanga linük tesem ajaklen tzu agi manungtsü.

"Tanü Ato kilonser Modi-i video conferencing ajanga iba campaign tenzüksüogo.

'Catch the Rain' campaign yagi tzu security nung rangloker inyaksü. Iba campaign ya linük nung tzungluruwa mongpu metenzükdang nungi tzungluruwa mongpu tashi-March 22 nungi November 30 tashi agitsü. Iba campaign ajangasa nüburtemi shilem agiba ajanga grass-root level nungi tzu wazüka ayutsü atema inyaksü. United Nations-i lemtetba World Water Day ya alima tesem ajungalen amonger, aser taküm iba omenji 'Valuing Water' lir," ta Ato kilonser, Modi-i metetdaksü.

World Water Day anogomong nung, tzu lemsatepa agitsü atema Uttar Pradesh aser Madhya Pradesh na tsungda tezungzüktep ka agiogo. Ken-Betwa Link Project nükjidadong ya tzu agi kanga anungba Bundelkhand region nung nüburtem tajangzük ngudaksütsü atema lir. Ken aser Betwa ayong na sendaktepba kübok Daudhan Dam aser canal ka yangluba ajanga state ana tsungda tzu lemsateptsü aser ibaji ajanga aluyimba li- 10.62 lakh hectare nung tzu agütsütsü, nisung lakh 62 dak tema nem tajemtsü tzu agütsütsü aser hydropower 103 MW adokdaksütsü.

Ken Betwa link project tezungzüktep kübok state temi amalitepa inyaksü; iba ya taoba mapang BJP lenir aser taoba Ato kilonser, asür Atal Bihari Vajpayee indang mangdang ataloktsür lir, kechiyong linük nung ayongtem sendaktepba ajanga tzu agi manungtsü atema pa mangdang liasü, ta PMO-i metetdakja liasü.

BJP-i Maharashtra nung President's Rule akhanger

New Delhi/Mumbai, March 22 (Agencies): Ochimashi ken o nung ajemdaker Hombarnü BJP-i Maharashtra nung Uddhav Thackeray-i aniba Maha Vikas Aghadi (MVA) teloktep sorkar aitsüba den külemi state nung President's Rule benoktsü takhangba agütsü.

Hombarnü Parliament House anaprong nung senden tenzüka sülen BJP MP temi Maharashtra nung ochimashi onük benok.

MPs- Navneet Singh Rana, Poonam Mahajan aser Union Minister Prakash Javadekar hungeri, state nung Uddhav Thackeray -i aniba MVA teloktep sorkari ochimashi tulu inyaker, ta aitsü.

Taoba mapang Mumbai nung police tongti, Parambir Singh-i Maharashtra Home Minister, Anil Deshmukh nem tai tongloksüba sülen BJP MP temi iba ken o junga bushisüngdangtsüla aser state nung President's Rule benoktsüla, ta takhangba agütsü.

Lok Sabha nung BJP MP,

Rakesh Singh-i, "Atangji tang mezüng linük nung Chief Minister kati (Maharashtra nung) osangbenertem senden ayongzüka API pusema jembir," ta aitsü.

MP temisa tangsa MVA teloktep sorkar nung Deshmukh anentsütsüla aser iba ken o junga bushisüngdangtsüla, ta takhangba agütsü.

Iba onük nung rongrong tulu adokba ajanga Rajya Sabha senden nikongdang 2:00 ako tashi thinena liasü.

Ano külen state BJP lenirtemi March 24 nü Angh, Bhagat Singh Koshiyari ajurua tang Maharashtra tensa atema jembitsü sentong lir.

Maharashtra sorkar tenüng menüksütsü atema asalentong yanglua inyaker, ta shia NCP lenir aser state minister, Nawab Malik-i, party-i Deshmukh minister menden nungi anentsü menügdak ta lemtetogo; bushisüngdang tembangba sülen ang Deshmukh atema telemtetba agitsü, ta metetdaksü.

BJP lenir aser Uttarakhand CM tasenba Rawat-i jembiba otem aitsür

New Delhi, March 22 (Agencies): Hopta ana tejaklen Tirath Singh Rawat-i Uttarakhand Chief Minister inyaksü atema tenangzükba agiba sülen pai tashishitsü o aika jembia arudar; Amongnüa (March 21) pai, linük shibangba mapang nung ration tali angutsü atema tanur aika asotsüla liasü, ta jembia.

PM Garib Kalyan Yojana kübok ketdangsertemi kibong shia seret 5 aser menjang seret kaka lemja liasü, aser iba dak sendakba nung Chief Minister Rawat-i, "Tanur 10 aliba kibongtem nem seret 50 agütsü, tanur 20 aliba kibongtem nem seret 100 agütsü aser tanur ana dang alir kibong nem seret 10 dang agütsü. Nisungtemi store yanglu aser talizükertem angü," ta jembia liasü.

"Iba atemaji shiba nem tai tongloksütsü. Tangbo nenoki tenük-meremer. Mapang aliba mapang nung nenoki tanur ana dang aso, kechiba tanur 20 maso" ta Chief Minister-i jembia.

Nainital kübok

Ramnagar nung kasa sentong nung jembidang British yimsüsüba den aitepa Rawat-i, America hungeri küm 200 tashi India yimsüsüa liasü, ta jembia.

"America hungeri küm 200 tashi parnok kübok asenok lidaktsü, parnoki alima tesem ajak yimsüsü. Anü kodanga maiba yimliji tanübo timtemdar," ta Rawat-i ashi.

Pai jembiba o nung ajemdaker BJP aija Congress party otongdar, Randeep Surjewala-i, party-i Uttarakhand CM atema Rawat shimba aitsü.

Ato kilonser, Narendra Modi-a aija Surjewala-i, pai (Modi) item ama sempet alirtem shimer, ta ashi.

Ano tanga osang ka nung, Hombar nikongdang Rawat-i twitter ajanga pa dak coronavirus tashidak putetogo, ta metetdaksü.

BJP leniri, "Kü dak coronavirus putetogo. Ni temang junga dang lir, timtem kecha mali. Doctor tem tetuyuba nung ni tangar den pilar lir. Tawa ni ajurua alirtema ajak tendangtsü aser kümdangtsü ni mepishir," ta metetdaksü.

BKU lenir Tikait leniba nung Bengaluru nung longkak ait

Bengaluru, March 22 (Agencies): Linük nung aluyimertem tashi sayuba sentong ka mesüka Hombarnü Bengaluru nung aluyimer lenirtem- Rakesh Tikait aser Darshan Pal nati Centre sorkari benokba aluyimba ozüng tasen anema longkak aitba sentong ka agiogo.

Aluyimertemi Delhi nung dang masü saka linük tesem ajaklen longkak aittsü, ta temaitü sayua parnoki India south tsütsü iba sentong ya agi.

Hombarnü aluyimertemi Bengaluru kübok KSR Railway Station nung lokti senden agi aser Freedom Park nung tembanga liasü.

Iba rally nungji nisung

15,000 shi aden, ta Horata (Karnataka) convenor, G C Bayyareddy-i metetdaksü.

Karnataka tesem balala nungi longkak aitba nung shilem agitsüpurtemi nikongdang Assembly complex longbanger longkak aita liasü.

Bayyareddy-i, "Külen Centre sorkari benokba aluyimba ozüng tamajungtem lir aser külen state sorkaria Karnataka Land Reforms Act yanglushiogo, koba ajanga aluyimba sector nung corporate tem agizüker," ta ashi.

Ano külen aluyimertem unions aika densema aliba Samyukta Kisan Morcha

(SKM)-ia March 26 nü linük tesem ajaklen longkak aittsü ayongzükogo. Linük nung aluyimertemi aluyimba ozüng tasen anema longkak ait tenzüker March 26 nü ita pezü abensaba anogo nung Bharat Bandh ayongzüka anepdang 6:00 ako nungi aonung 6:00 ako tashi linük mokdangtsü.

Holi benjung nü- March 28 nüa aluyimertemi aluyimba ozüng tasen asem kaketterongdoktsü aser April 5 nü aluyimertemi linük tesem ajaklen Food Corporation of India indang office tem longbanger anügdang 11:00 ako nungi nikongdang 5:00 ako tashi longkak aittsü.



March 22, 2021 nü Madurai (Tamil Nadu) nung Dravida Munnetra Kazhagam (DMK) party lenir, Udhayanidhi Stalin-i Tamil Nadu assembly election atema road show nung shilem agiba noksa nung angur.

Rohingya refugee camp nung mi lendong atalok



Cox's Bazar, Metsüremi/March 22 (Agencies): Bangladesh south tsütsü Rohingya refugee camp nung kitsük-kirong lendong tulu adoka süki noklang aika den danga ki-o-jen aika rongdok, ta ketdangsürtemi ashi.

Hombarnü social media nung video prokshiba nunga Cox's Bazar indang Balukhali Camp temalen mokozü agi sünger liasü.

United Nations' refugee agency (UNHCR) indang odongtar Louise Donovan-i osangbener dang ashiba agi, lendong atalokba tesem nung mi remseptsü asoshi firefighter, rescue and response team oa liasü aser tali kaoloka aotsü aliba nungi kumzük.

"Refugee Relief and Repatriation Commission (RRRC) aser emergency services den

külem linüktemi teyari agütsür. Anasa aliba camp tem nungi volunteers noklang aika anidena yariteper," ta lai ashi.

"Mi yagi jenokba tesem, health centre, osettsüset lemtsüba tesem amala nung kongshia lir. Mi agi kongshia alidak volunteer temi yariteper," ta laisa ashi.

Mi ya nikongdang 3:30 meta atalok, ta yangji alirtemi ashir. Iba mi ya liquefied petroleum gas (LPG) cylinder apokba nungi tenzük, ta kari ashir, saka ano mejangjateti lir.

"Yangji alirtemi mi ya remseptsü merang. Saka kanga kera mi ya tuluba akum," ta Balukhali camp nungi Rohingya nunger lenir, Lalu Majhi-i osangbener dang ashi.

Iba lendong nung asü-ama osang mali, ta Balukhali camp anasa aliba 14th armed police battalion tanishir Atiqur

Rahman-i ashi.

Süki 700 dak tema rongdokogo, ta Rohingya community leader, Mayyu Khan-i ashi.

Arishi küm 19 tain tetsür ka den arishi küm trok aser tekü tanur ana asü, ta osang lir, ta nisung kati ashi.

January ita nunga Cox's Bazar nung aliba Rohingya refugee camp ka nung kitsük kirong lendong ataloka nisung meyirijang aika talidak ki makai akum.

Iba mapang Nayapara camp nung nisung 3,500 shi aliba ki 550 aser dokan 150 shi rongdok, ta ashir.

Rohingya nunger million ka dak tema southern Bangladesh kübok camp balala nung alir, aser parnok ya timbaka 2017 küm Myanmar nung mitkartemi azüdokshiba ajanga jena aruba lir.

Niger yimtsüng ka nung nisung 22 khaset

Niamey, Metsüremi/March 22 (Agencies): Southwestern Niger nung Deobarnü pragbong bener nisung telok kati civilian 22 khaset. Kasa tesem nung hopta majung tsüngda mejangjaba nisung telok kati yimtsüng ka nung nisung 58 tepsetba sülen tang iba lendong atalokogo.

Item nisungtem yagi Mali aser Burkina Faso arrtsü nung aliba Tillabery tesem nung yimtsüng asem amak. Security source kati ashiba agi, Islamic State rarartemi iba lendong bener arutsü, ajisüaka local source anati yimtsüng amakertem indang osang magütsü.

Iba tesem nung Islamic State den sendaktepa aliba local telungpurtem inyaksangshir aser taoba mapanga civilian aser sepaitem tepsetba parnok dak tai tongloktüsügo.


Iba azütokshi maparen ya Africa anüolen Sahel tesem nung security tsütsü mepetmesü adoker aliba nung shilem ka lir, koba al Qaeda den sendaktepa aliba telungpurtem aser lisopur telungpurtem mapa lir.

Tillia mayor Alfouzazi Issintag-i, nisung aika süogo ta ashi saka nisung kwi asü iba indang osang tejangja magütsü.

Taoba Hombarnü Tillabery nung hopta shia amenba ba-zaar ka nungi nüburtem meyipa arua aliba mapang nisung telok kati civilian 58 khaset aser iba sülen yimtsüng ka amak.

Telungpurtem asütsü ta temulung meleme bilemertemi January 2 nüa Tillabery kübok yimtsüng ana maka civilian 100 tepset, koba linük nung tawa tatalokba rongnung tamajungtiba liasü.

Election agir anogo ka lir Congo opposition candidate asü



Brazzaville, Metsüremi/March 22 (Agencies): Republic of Congo indang election nung opposition telok nungi tir asoshi tokteper nübu tejangja, Guy Brice Parfait Kolelas, election agir anogo ka lir asü.

Kolelas ya election aginü mozü kidangi anir aotsüsa shirang aser France-i temang anepalutsü anir aoba mapang COVID-19 agi asü, ta pa indang campaign director Christian Cyr Rodrigue Mayanda-i osangbener dang Hombarnü ashi.

Kolelas ya medical aircraft nung asü, koba Deobar nikongdang Brazzaville-i pa anitsü arua liasü, ta Mayanda-isa ashi.

Kolelas ya coronavirus menaba sülen linük yimtiba, Brazzaville nung nija mozüki ka nung anepalua liasü, pa kinunger kati Honibarnü ashi.

Brehostibarnü pa dak ramen alitsü südi, ta osangbener kar dang shir

Hokulbarnü nübuyim tatembang nung Kolelas medentet.

Hokulbarnü social media nung video ka prokshiba nung arishi küm 61 tain Kolelas ya oxygen mask agir mozüki yipten nung mejanger teka nung blood pressure cuff inoker liasü.

"Külem senso tajungtem, ni timtem nung lir. Ni tasüba den rarar. Ajisüaka ni nenok dang temelenshi asoshi vote agütsütsü ayongzüker," ta pai oxygen mask agiener tanemi ashi.

2016 küm tir election nung Kolelas ya lenir Denis Sassou Nguesso sülen vote shilem 15 shi nguteta liasü. Pa tebu Bernard Kolelas ya 1997 küm Congo nung civil war aliba dang mapang tatsüka ato kilonser inyaka liasü.

Nguesso den tokteper rongnung Kolelas ya tejangja nübu ka liasü. Nguesso-i iba linük nung küm 36 tashi yimsü süa lir.

Myanmar nung osangbener ka chiokogo

Yangon, Metsüremi/March 22 (Agencies): Myanmar nung nüburtemi maneni military-i sorkar atsüngba anema longkak aiba mapang ka nung BBC osangbener ka chiokogo, ta broadcaster-i Hombarnü metetdaksü.

Myanmar nung junta-i longkak aiteritem dak tashiyim amshia arudar, shirnok taoba ita Aung San Suu Kyi-i aniba sorkar military-i atsüngtokba anema nokdaka arudar.

Tang tashi nung nisung 2,600 dak tema puogo aser nisung 250 tepsetogo, ta Assistance Association for Political Prisoners (AAPP)-i metetdaksü.

BBC indang Burmese service osangbener Aung Thura ya Hokulbarnü Myanmar yimtiba Naypyidaw nung okadak ka kima osang agia aliba mapang pur ao.

BBC-i Hombarnü parnok indang website nung pa chiokba osang agütsüogo,

ajisüaka osang tejangja meshisem.

Hombarnüa tesayurtem densema nüburtemi aikati Mandalay kübok pre-dawn streets nung longkak aita senzüogo aser parnok rongnung karibo UN teyari meshia placards tem amer liasü.

Military-i sorkar atsüngba sülen sepaitem lokti azüoktsü merangba mapang lendong tulu atalokba yimtitem rongnung Mandalay-a ka lir, kong Deobarnüa nisung ti asü, ta medical source kati AFP dang ashiba den ano nisung 50 yirur lir ta metetdaksü.

Iba yimti nung aonung tesü tashi Machine guns akhaba ola angazükogo.

"Nüburtem aonung sangwa tetsübu nung liasü," ta doctor kati AFP dang phone ajanga ashi.

Sepaitemi tashiyim amshia longkak aiteritem azüoktsü merangba anema Mandalay

nung doctor telok kati "placard only" demonstration sentong ka ayongzüka agi, aser parnoki yimtung süa sign balala tokja liasü, ta Voice of Myanmar sangdong ka ajanga metetdaksü.

Kasaji monk telok katia longkak aita liasü.

Maneni Myanmar nung yimti tulutiba Yangon nunga gari anirtemi longkak aiteritem pusama anepdang yakta pei gari nung horn agüja senzü.

Yangon kübok Hlaing tesem nung alirtemi helium balloon temerem nung UN teyari meshia osang balala zülur yoka liasü, ta local media sangdong ajanga metetdaksü.

Deobarnü Monywa yimti nung sepaitem den mangatettep adokba sülen nisung ka tepset aser iba sülen anogo ka lir nisung aika adenshia longkak aitogo, ta local media sangdong ajangsa metetdaksü.

Mon nung tetsürtem atema Anemia Camp ayongzük



Mon, Metsüremi/March 22, 2021 (TYO): Tang, Mon District nung tagidak aliba Poshan Pakhwada sentong shilem ama, Social Welfare Department Mon den teloktep Department tem longjemer Hombarnü (22.03.2021) Konyak Union Conference Hall, Mon nung tetsürtem aser tainlonglong tetsürtem atema Anemia camp sentong ka ayonga agiogo, ta sangdong ka ajanga metetdaksü.

DPO (ICDC) Mon, Tauhong Ngonyen-i, sozükli nungi arishi küm 6 tsüngda tanurtem, mashisa alir tetsürtem aser tanur sor alir tetsütem indang nutritional jenjang asadanga küm shia India tesem ajunga nung Poshan Pakhwada sentong ayonga agir, ta ashi.

Iba camp ajanga taküm piyong amshia/inbaka aotsüsa

tangazükba jenti angutsü, ta metetdaksü aser angazükbatem pei atema dang mesüi tangar danga iba osang lemsateptsü asoshi sentong nung adenertem pai ajungshia liasü.

Sentong nung Shisalen sayur, MO Shangnyu PHC, Dr. Penjei Konyak-i, anemia (azü nung red blood cells/ haemoglobin peria maliba), iba tashidak ajanga temang nung timtem balala agütsüba, iba tashidak temaitsü aser iba tashidak atema taneptsü lenmang indang telok dang metetdaksü.

Pai ashiba agi, anemia tashidak ya tetsür dak timba adoker asünung, tainlonglong tetsür aser mashisa alir tetsürtem atema Anemia Camp ya ayongzüksür. Anemia tashidak ya chiyongtsü tapet

chia aser mozü shitak achiba ajanga aneptsür.

Paisa, shishilembadak iron peria aliba chiyongtsü balala anguba indang telok dang metetdaksü.

Kasa sentong nung, School Health Programme Coordinator, Mon District, Mewang Konyak-i telok dang National Deworming Day indang metetdaksü, koba arishi küm 1 nungi 19 tanurtem atema küm nung anaben tashi iba sentong ayonga agir.

Maneni, iba Camp sentong nung shilem agir tetsür 125 shi anemia atema screening agiogo. Iba sentong nung District Project Assistant, Poshan Wangton menden liasü aser District Coordinator Poshan, Nokyam Khoiyem-i tepela anküp o jembi, ta kasa sangdong ajanga metetdaksü.

Ngaulong Lodi nung market shed ka lapoktsü

Tening, Metsüremi/March 22, 2021 (TYO): EAC, Nsong, Peren Tumben P Tsanglao, NCS-i anir District Administration ajanga Honibarnü (20.03.2021) Ngaulong Lodi village, Peren kübok Nagaland- Assam-Manipur indang Tri Junction nung marketing shed ka lapoktsüogo. Beti Bachao Beti Padhao (BBBP) kübok iba project inyak tenzük.

Iba sentong nung Tumben P Tsanglao alakteta tejaoker ama

aruagi aden aser iba market shed takok ngua amenokba atema pa nübur nem tenüingsang agütsü.

Pai ashiba agi, iba market shed ajanga nüngdakbatem talisa chiyongtsü, süoshi aser alu nung amshiba osettem densema kidang amshiba osettsüset balala angutsü.

Kidanger state den tesendaktep tajung aser yimjiyimjung alitsü asoshi pai nüburtem ayongzük.

EAC-i, BBBP kübok

sentongtem talisa Samridhi Sukanya Yojana indang metetdaksü. Iba den külemi, COVID-19 vaccination drive atema sensitisation sentong tem takok ngua agia aoba indang pai metetdaksüogo.

Iba sentong nung Kalak-i telok pela agizükba aser village chairman Chiwang menden liasü, ta sangdong ajanga metetdaksü.

Tuensang nung Sorchiokba toktep



Tuensang, Metsüremi/March 22, 2021 (TYO): Poshan Pakwada shilem ama, Hombarnü (22.03.2021) Model Anganwadi Center, Tuensang Village nung Social Welfare Department (ICDS) Tuensang-i "Local Nutritious Recipe" omen nung ajemdaker Cooking Competition sentong ka ayonga agiogo.

Iba Sorchiokba toktepba atema tendanger temji BMP NSRLM Noksen, Mushiu aser

Block Coordinator Thonoknyu, Imlong na liasü. AWW Center-B, Tuensang Village nungi Chongkimonyu-i mezügbuba jenjang nung takok angu. AWW Center-C, Tuensang Village, Yongchingsonla-i tanabuba aser AWW, -B Khel Tuensang Village, B. Khumla-i tasembuba jenjang nung takok nguogo. Iba competition nung nisung 15 agi shilem agiogo, ta sangdong ajanga metetdaksü.

Wokha nung World Water Day mungogo

Wokha, Metsüremi/March 22, 2021 (TYO): Hombarnü (22.03.2021) Department of Executive Engineers office PHED Wokha-i "Valuing Water" omen nung ajemdaker World Water Day mungogo.

Iba sentong nung District coordinator DWSM, Wokha Aremo Oving-i okila jembiba mapang, alima tesem ajunga nung tzu agi timtemba asadanga nübur dang tekümdangtsü sangdongtsü asoshi tongti shilem agia inyaktsüla aser tzu apayua kümdanga amshitsü atema telok ajungshia liasü.

Paisa, "Jal Shakti Abhiyan-catch the rain campaign, where it falls, when it falls" indang mapatong metetdaksü. Iba campaign ya World Water Day 2021 anogomung nung Ato Kilonser Modi-i lapoktsü aser tzünglu tzu junga bensentsü atema water storage tank tem junga yanglur amshitsü asoshi iba campaign ajanga nüburtem

Tenüingsang Agütsür

Tepela tulu nung, onok DIMAPUR AREA CHUCHUYIMLANG SENSO WATSU TELONGJEM-i item jenjang tajung angurtem nem tenüingsang tulu agütsür :

1. **Wt. AKOKLA PONGEN LUCY**, la National Co-Operative Union of India Women Empowerment Committee nung züngsem asütsü atema Alima Tetsürtem Anogo, March 8, 2021 nü New Delhi nung shimokba asoshi la nem tenüingsang agütsür. Iba ama jenjang tajung nung tetsür shimtetba ya Nagaland nungi la mezüng lir.
2. **Wt. WAPANGINLA**, lai Alima Tetsürtem Anogo, March 8, 2021 nü Hope Channel Dimapur aser One Stop Centre, 5th Assam Rifles, Sakhi, NABARD nati ayongzükba sentong nung Weaving Designer Award ngutetba takok asoshi la nem tenüingsang agütsür. La ya Wapanginla Weavers, Handlooms & Handicrafts nung kibur lir.

Ano maneni tarutsü nunga nenok mapa ajak nung Tsüngremi anema aliba temoatsü aser takok agüjang ta sarasademtsür.

Sd/-
M. ASANGLA
President, DACSWT.

Sd/-
MOANUNGLA JAMIR
Gen. Secretary, DACSWT.



Office of the
Ongpangkong Watsü Mungdang

PELABA SANGDONGER

17th Buba Ongpangkong Watsü Mungdang 19th March 2021 anogo nung yimsüing aser Town unit shia nungi tejaoker den putu yimsüsür aser sentong nung atener ajak agi nisung 573 atenshia Town Hall nung meraketa mongogo. Iba sentong nung tongti O jembir Wt. Dr. Lanurenla Assistant Professor Fazl Ali College Mokokchung, Wb. Limawapang Jamir Deputy Commissioner Mokokchung, Ongpangkong Mungdang, Wt. Maoangla Tir Watsü Mungdang, Sp. Limatongzük Jamir Tir OKM, MMC, administrator, Superintendent of Police, CMO Office Mokokchung, media, kija aser lokti balala nem shilem nungloksüba ama ajaki mulungsoa takok ngudakja yaritepa asoshi pelaba lemsateper. Iba den nüburi melentsü lemtetba ama 2021 nungi OWM melen OTM ta amshitsü.

OTM KETDANGPUR TASEN ITEMIALITSÜ

1. Mendenbula : Wt. Akumchila Longmisa
2. Mendenbula Yarila : Wt. Asangtila Aliba
3. Tezülur : Wt. Imodangla Mangmetong
4. Tezülula Yarila : Wt. Rongsenrenla Mekuli


SEN ZÜLURTEM

1. Sen Zülur : Wt. Supongmenla Longsa
 2. Sen Zülur Yarila : Wt. Tajentila Longkhum
- KIMEN : Wt. Zulukala Longsa
KEN-O-METANGER : Wb. I.Imkong Jamir Advocate, Chungtia

Ongpangkong Watsü Mungdang Tenüing nung

Sd/-
Wt. Talichula
President, OWM

Sd/-
Wt. Nungsangtula
Secretary, OWM



ajungmesotsü nükjidong yur inyaktsü.

IEC consultant Khonzani Kithan-i "Valuing Water" aser "water2me", koba taküm indang digital theme lir, iba omen nung ajemdaker jembiogo.

Lai, tzu kümdanga amshiba, tzu dak sendakba tongtibangtem aser tzu ajanga temang nung teyari agütsüba indang telok dang rasa ashi.

Tang alima tesem balala nung nüburtem tzu agi rokongba

asadanga iba nung temulung agütsür inyaktsü aser iba timtem koktettsü mechi longjemer inyaktsü asoshi lai sentong nung adener ajak ajungshia liasü. Iba den külemi, tzu anepalua riziügdana ayutsü yimyatem amshi tenzüksüla, ta lai ashi.

Iba sentong nung Sanitation & Hygiene consultant, PHED Wokha, Vimezo Nyiseno menden liasü, ta sangdong ka ajanga metetdaksü.

India-i 10m Air Pistol Mixed Team Event nung Gold angu

New Delhi, Metsüremi/ March 22 (Agencies): New Delhi nung asaya aliba ISSF World Cup nung Hombarnü India team nungi Saurabh Chaudhary aser Manu Bhaker nati 10m air pistol mixed team asaya nung gold nguogo aser kasa asaya nung India nungersa Abhishek Verma aser Yashaswini Deswal Bronze nati bronze medal ngua liasü.

India nunger asayar Manu aser Saurabh nati final nung Iran nunger tarep Golnoush Sebahatollahi aser Javed Foroughi na 16-12 agi koka liasü. Tanabuba series nung 0-4 agi tesülen aliba meyiper Manu o Saurabh nati asaya akok.

Iran nunger asayartem kanga junga asaya tenzük ajisüaka asaya tenzükli timtem ajangtetba sülen India nunger asayartemi imlaa aliba ama kanga jung temaba jenjang nung tembang. India team asoshi iba asaya akokba ya gold pongububa liasü.

India asoshi Yashaswini Singh Deswal aser Abhishek Verma natia bronze medal nguogo. Tasembuba jenjang atema asayaba mapang tenati Turkey nunger tarep Sevval

Ilayda Tarhan aser Ismail Keles 17-13 agi koka liasü. Maneni Hombarnüsa India nunger asayar Divyansh Singh Panwar aser Elavenil Valarivan nati 10m mixed air rifle event nung gold medal nguogo.

Gold medal asaya nung Panwar aser Elavenil na senteper point 16 nguteta tenati Hungary nunger world number one tarep Istvan Peni aser Eszter Denes na akok. Tenati point 10 angu.

Tatembangbuba shot nung India nunger asayar anapronglai 10.4 akha aser Hungary nunger asayar ana yagi 10.7 aser 9.9 ngua liasü.

ISSF World Cup nung kanga junga asayaba sülen 10m Air Pistol shooters Abhishek Verma aser Yashaswini Deswal na tawa sayaba rangking nung temaba jenjangi tuogo. Kasa mapang nung Elavenil Valarivan, tetsür 10m Air Rifle rankings nung maneni jenjang masetshi lir.

Maneni, kasa asayamung Men's Skeet team tetoktepba nung India nunger shooter temi ano shilem tajung agia medal nguogo. Men's Skeet nung India nunger Mairaj Khan, Angad Bajwa aser Gurjoat

Khangura nungeri gold medal ngua team medal tally 14 tashi tuogo.

Men's Skeet team asayamung nung India team-i 6-2 agi Qatar tsükdaksü. Women's Skeet team nung Parninaaz Dhaliwal, Kartiki Shaktawat aser Ganemat Sekhon nungeri Silver medal anguba sülen tebur team-i kasa tetoktepba nung gold medal ajangzüktet. Tetsür Skeet team asaya nung, India tetsür team-i 4-6 agi Kazakhstan team makok.

Hombarnü, India Shooting team atema Mairaj, Angad aser Gurjoat nungeri gold medal tasembuba takok ngua liasü.

10m Air Rifle Mixed Team asayamung nung Elavenil Valarivan aser Divyansh Singh Panwar nati India team atema mezüng gold medal takok ngutsü.

New Delhi nung Shooting World Cup tenzük anogo asemnü asayar sülen India nungeri iba asayamung nung tang tashi nung medal 14 nguteta lir, kong gold 6, silver 4 aser bronze 4 dena lir. USA team-i medal 6 dang nguteta medal tally tanabuba jenjang tongteta lir.

PELABA LEMSATEPER

Spring Badminton Championship takok ngua agitettsüsa kija, telok aser tentet balalai lenmang balala ajanga nungita aruba atema Soyim Shuttlers-i nenok ajak dang pelaba lemsateper. Onoki item dang alakteta pelaba metetdaksür:

1. Mr.& Mrs.Sharingain Longkumer, Speaker, NLA
2. Mr & Mrs Moatoshi Tzudir, Class One Contractor.
3. Mr & Mrs Imkongmar, President AMAM
4. Mr & Mrs Lanusunep Jamir, Chief Agent to Speaker, NLA.
5. Mr.&Mrs.K Bendangtoshi Pongen, Proprietor Saramati Construction
6. Mr & Mrs Tinungangshi Imsong, Proprietor Hindustan Petroleum.
7. Mr Tiakumzuk, Proprietor Mkg Sports Store
8. Ms. Noktitsungla Longkumer, Proprietor N.N Florist
9. Mr Vashinpong Jamir, proprietor Shindir Ola.
10. P Imty Walling, proprietor Trident Enterprise.
11. Bank of Baroda, Ungma branch.
12. Mr & Mrs K Temjen Jamir, proprietor Tir Yim Yim, shirnok tenla teyari aser tsüngdong arua adenba ajanga iba Championship asayamung tali meraketdakja aser takok ngudaktsüogo. Ano maneni Ungma Village Council, Ungma Baptist Church, Mokokchung District Badminton Association, Mokokchung Refrees aser Umpires Association ajanga teyari balala agütsüba asoshia pelaba lemsateper aser Mokokchung nung aliba badminton club balala nungi shilem agirtem dang kanga pelar, kechiaser nenoki anibelem mesasai inyakba ajanga iba Championship takok ngua agitetogo.

Onoki nenok kija shia tenüng teta pelaba meshitetaka nenoki tenla tajung agütsüba asoshi kanga pela agizük aser tarutsü nunga nenok maparen ajak nung takok tajung lidakjangma ta onoki sarasademtsür.

Sd/-
Alimayang Jamir,
President,
Soyim Shuttlers

Sd/-
Kikatemjen Longkumer
General Secretary,
Soyim Shuttlers

National C'ship nung Arunachal athlete temi medal 4 angu

Guwahati, Metsüremi/ March 22, 2021 (Agencies): West Bengal nung ayonga agiba - 30buba Sub-Junior, Senior, Master aser Physically Challenged Men & Women National Strength Lifting aser Incline Bench Press Championship 21 asayamung nung Arunachal Pradesh athlete temi silver medal 3 aser bronze medal 1 takok nguogo.

Iba asayamung nung athlete Katu Yomcha aser Chera Yana nati medal pezü tashi takok anguba atema, Hombarnü

Arunachal Pradesh chief minister Pema Khandu-i tena nem tenüngsang agütsüogo.

National championship asayamung ya West Bengal indang Cooch Behar nung March 17 nungi 20, 2021 tashi asaya liasü.

Katu Yomcha-i 'strength lifting' nung silver medal aser incline bench press nung bronze medal angu.

Kasa strength lifting aser incline bench press category nung Chera Yana-i silver medal ka ka takok angu.

"State nem naroküm bener arutsüba atema Arunachal nungi 'Strengthlifters' Ms Katu Yomcha aser Ms Chera Yana anaprongla nem tenüngsang agütsür. West Bengal nung ayongba National Strength Lifting and IBP Championship 21 nung tenati medal pezü takok angu. Nünati iba jenjang ajangzüktetba atema nüma-tanger aser tarutsü nunga maneni takok tajung angutsü imlaa atar," ta Twitter sangdong ajanga Pema Khandu-i lemsatep.



Mokokchung Inter-Ward Football Tournament ayongzüker telok Youth Association Marepkong (YAM)-i Mokokchung nung football asaya ajungkettsü aser sempet aketer lanurtem anitetsü nükjidong nung March 22 nungi 'coaching camp' sentong ka yangi Imkongmeren Sports Complex nung ayongzüka kadaki. Iba camp nung tawa tembangba Inter-ward tournament nung shilem agir ward 16 nungi nisung ana-na shima coaching agütsür. Iba camp nung Life Sports Football Club nung coach (D certificate holder) - Diethozotuo aser Kohima Eagle's FC nung coach - Zakietuolie nati tesayuba balala agütsüdar aser iba camp ya March 27 tashi akatsü. Coach ana ya Nagaland Football Coaches Association (NFCA) nunga züngsem tajung kaka lir.

Tanü nungi 36buba PDSA meet tenzüksü

Kohima, Metsüremi/ March 22, 2021 (TYO): Thenyizu yim dak, Mongolbarnü (23.03.2021) nungi Phek District Sports Association (PDSA) indang 36buba meet den 1buba Naga style category wrestling meet ayongzüksü terenemba lir, ta sangdong ka ajanga metetdaksü.

Chokri Area Games & Sports Association (CAGSA) ajanga iba meet ayongzüksü aser March 27, 2021 tashi asayatsü.

Iba asayamung lapokba sentong nung, Deputy Chief Minister, Y. Patton alakteta tejaoker aser Planning & Co-ordination, Land Revenue and Parliamentary Affairs Minister, Neiba Kronu tetushi tesemdang ama jaoka lir.

PDSA meet lapokba sentong ya anepdang 9:00 ako nungi tenzüksü.

Iba sülen, Naga-style category wrestling (Men) under 65 kg; below 74 kg aser 86 kg telemsatem asayatsü.

Tetsür aser tebur atema football, basketball aser volleyball dak alaka, iba meet nung tetsür aser tebur atema 100 metre dash, 200 metre sprint, 400 metre race, 800 metre race, 1500 metre race, 4x100 metre relay race, 3000 metre race (Women) and 5000 metre race (Men). Field events- Discuss throw, Javelin Throw, Shot put, Long Jump, High Jump, triple jump aser arm wrestling ayongzüksü.

Iba meet nung jury board temji Nezosa Tetseo president PDSA, Hukhoneyi Soho president PDAA aser Colo Mero, president FAPD nunger alitsü.

Maneni, iba meet nung athletic asayamung atema Hukhoneyi Soho chief referee alitsü. Football atema Vesurayi Venuh, volleyball atema Tsibu Khesoh, basketball atema Surhoneyi Soho aser wrestling atema Vekhriyi Chuzho nunger chief referee ama shilem agitsü, ta kasa sangdong nung shia lir.

BILEMDANGANG

"Alima melenshia aoba den külemi nüngdakjia talila nüngdaka akümer."